

Numbernan

Un buriku ku ta papia, kolebra di brons kologá riba un palu ta kuraesnan ku kolebra a morde si nan wak e, tera ta habri i guli hende, un bara ku ta floriai duna fruta. Sin duda storianan interesante, straño i spantoso ta aparesé den e di kuater buki di Tèstament Bieu.

Moisés a guia Israel for di esklabitut na Egipto i a hiba nan na Seru Sinaí. Aya, nan a hasi un aliansa ku Dios. Nan a bai di akuerdo pa warda e mandamentunan ku Dios a duna nan. E buki ta habri ku Israel na Seru Sinaí, mas òf ménos ún año despues ku nan a sali for di Egipto. Numbernan ta konta historia di e generashon di israelitanan rebelde ku a sali di Egipto, nan piká, nan dwalmentu den desierto i e siguiente generashon di Israel.

Talbes lo ta un yudansa pa haña un mihó bista di Éksodo, Levítiko i Numbernan. E storia di Israel su liberashon for di esklabitut na Egipto i nan viahe te Seru Sinaí ta relatá den Éksodo 1-18. Éksodo 19 te Numbernan 10:10 (inkluyendo e buki di Levítiko) ta konta tokante nan estadia na Seru Sinaí. E viahe di e israelitanan for di Seru Sinaí ta na e sabananan di Moab (na riu Jordan) ta e tópiko di Numbernan 10:11 – 36:13.

E buki di Numbernan ta kontinuá ku e storia unda e buki di Éksodo ta terminá. Éksodo ta klousurá “den e promé luna di e di dos año, riba e promé dia di luna” (Éksodo 40:17) i Numbernan ta habri “riba e promé dia di e di dos luna, den e di dos año despues ku nan a sali for di tera di Egipto” (1:1). Tin solamente ún luna meimei di e dos buki.

Numbernan ta siña Israel kon pa funshoná komo un kampamentu grandi. E buki aki ta trata ku leinan i organisashon di e partinan religioso, sivil i militar di e nashon. Tambe e outor ta relatá eksperensianan di e israelitanan.

I. NÒMBER DI E BUKI

Pa hende di nos era moderno, nòmber di e buki aki ta deskurashá hende di les'é. Pa nan, “Numbernan” ta un título mes yamativo ku un buki ku ta yama “Buki di Telefon”. Ma maske e buki ta habri ku un senso, e no ta un buki laf.

Nòmber hebreo di e buki di Numbernan ta “Bemidbar” (nifikando “den desierto”) ta tumá for di Numbernan 1:1. E ta un nòmber apropiá pa e buki pasobra Numbernan ta trata ku eventonan importante di Israel su 40 año den desierto kuminsando poko tempu despues di nan salida for di Egipto te poko luna promé ku morto di Moisés.

Nos ta haña e nòmber “Numbernan” for di tradukshon griegu di e teksto hebreo. E traduktor di e buki a dun' é e nòmber griegu “aritmoi” ku ta nifiká “number”.

Ta parse ku e nòmber aki ta fiha riba e dos sensonan (kapítulonan 1 i 26) den e buki. Talbes nos por pensa ku e no ta un bon título pa e buki. Ma mirá mas djaserka e ta apropiá. E dos senso a wòrdu tumá ku un lapso di 38 año meimei. E promé senso a sosodé ora Israel a kaba di sali for di Egipto. E senso tabata nesario pa organisá e puebel pa kontinuá e viahe i pa prepará nan pa biba den e Tera Primintí. Ma pa motibu di nan inkredulidat i desobediencia, nan no por a drenta e Tera Primintí pa 40 año—te henter e generashon ei a muri. Final di e buki ta tuma lugá 38 año despues. Pesei nan a tuma un otro senso, reorganisando pa drenta e Tera Primintí. Por bisa anto ku e buki ta kubri un periodo di 38 año i 9 luna.

Pues, e dos senso ta konta henter e storia di e buki. Den e sintido ei por bisa ku “Numbernan” ta un nòmber apropiá pa e buki.

II. SKIRBIMENTS DI E BUKI

Nos ke pensa un ratu tokante e outor di e buki, fecha ku e buki a wòrdu skirbí i e pa ken e outor a skirbi e buki.

A. OUTOR DI E BUKI

1. Moisés

Maske ningun teksto ta bisa spesífikamente ku Moisés a skirbi e buki di Numbernan (òf e sinku buki di Pentatuk) tin basta evidensia ku el a skirbi e buki aki. Ki evidensia tin ku Moisés a skirbi e Numbernan?

- a. Pa di promé, Numbernan 33:2 ta laga sa ku Moisés a skirbi e lista di lugánan unda Israel a pasa den nan viahe for di Egipto: “Moisés a rekòrdá nan lugánan di salida konforme nan biahenan, segun e òrdu di SEÑOR.” E palabra “rekòrdá” ta nifiká “tene rekòrt, nota òf registrá” na lugá di “kòrda atrobe”. Klaramente, Moisés tabata skirbi durante tempu ku Israel tabata den desierto. (Eksodo 17:14; 24:4; 34:27; ets. tambe ta konfirmá esei.)
- b. Klaramente Pentatuk ta un unidat i tabata skirbí dor di un gran outor. Nos a konkluí ku e persona ei tabata Moisés. Pues, Moisés lo tabata outor di Numbernan tambe.
- c. Moisés tabatin e edukashon ku lo a prepar’é pa skirbi e buki (Echunan 7:22).
- d. Moisés tabata e persona sentral den e liberashon di Israel for di Egipto i despues i ta lógiko ku e lo a skirbi Israel su historia.
“Esakinan ta e mandamentunan i ordenansanan ku SEÑOR a ordená e yunan di Israel pa medio di Moisés...” (36:13). Rípidamente e buki di Numbernan ta bisa ku Dios a papia ku Moisés (mas ku 80 biaha). Mas òf ménos mitar di e kapitulonon ta kuminsá ku un ekspreshon manera “SEÑOR a papia ku Moisés” (méskos ku buki di Levítiko). Esaki no ta proba na un forma konklusivo ku Moisés a skirbi Dios Su palabranan. Ma esei ta un konklushon lógiko.
- e. Otro outor bíbliko ta sita e buki di Numbernan i ta bisa ku Moisés tabata e eskritor:
 - 3:6 – Esdras 6:18
 - 4:5 – 1 Krónikanan 15:15
 - 8:9 – Esdras 6:18
 - 18:7,20 – Josué 18:7
 - 35:2 – Josué 21:2
 - 35:6-34 – Josué 20:2

Tin poko duda ku Moisés (òf talbes su sekretario bou di su guia) a skirbi i kompilá gran mayoria di e informashon kontené den e buki.

2. Un Redaktor

E echu ku Moisés a skirbi e buki no ta demandá ku Moisés mester skirbi kada palabra. Nos ke mira diferente teksto unda tin interogante si Moisés a skirbi tur e palabranan.

Numbernan 12:3 ta bisa, “(Awor e hòmbler Moisés tabata masha umilde, mas ku tur hòmbler ku tabatin riba superfisio di tera.)” Ta lógiko pa puntra si Moisés a skirbi esei. Un persona umilde lo no skirbi esei di su mes. Un hende ku ta hasi un deklarashon asina, no ta umilde.

Tin dos splikashon pa e palabranan aki. 1) Ta pusíbel ku Dios a instruí Moisés pa skirbi e palabranan aki. 2) Un redaktor a inkluí e palabranan aki den e teksto bou guia di Spiritu Santu.

Tin interogante si 15:32-36 tabata hinká den e teksto despues ku Moisés a kompilá e informashon ku a forma e buki. Tur loke Moisés a skirbi den e buki a tuma lugá den desierto. Pues, pakiko Moisés lo skirbi “Awor mientras ku e yunan di Israel tabata den desierto...” Esei ta duna indikashon ku e teksto aki tabata agregá despues.

Tambe ta notabel ku e outor a sita otro dokumento (“Buki di Guernan di SEÑOR”) den 21:14-15. Ta pusíbel ku e dokumento aki a wòrdu skirbí despues ku Moisés a skirbi e buki di Numbranan. Si esei ta e kaso, un redaktor a inkluí e sita aki.

Klaramente Moisés no tabata presente, ni tabata sa mes kiko tabata sosodé entre rei Balak i e profeta falsu Balaam. Ta desconosí kon òf ki tempu Israel a logra haña e storia kontá den Numbranan 22-24. Ta hopi pusíbel ku Moisés nunca a tende e storia di Balaam, i pues e kapitulonon aki tambe tabata agregá den e buki despues di su morto.

Un otro pusíbel adishon di parti di un redaktor ta Numbranan 32:34-42. Kasi sigur ku tur e eventonan deskribí den e teksto aki tokante e erensia di dos i mei tribu di Israel parti pariba di Riu Jordan no a keda kompletá promé ku Moisés su morto. E tribunan por a eredá e teritorio. Ma nan no tabatin tempu pa konstruí tur loke e teksto aki ta deskribí promé ku Moisés a fayesé. E hòmbrenan di e tribunan aki a yuda e otro tribunan konkistá Kanaan promé ku nan a regresá na nan kas,

B. FECHA DI E BUKI

En kontraste di e buki di Levítiko (ku ta kubri un periodo di solamente ún luna), e buki di Numbranan ta kubri un periodo di 38 aña i 9 luna. Maske Moisés a kompletá e buki na final di e kuarenta aña den desierto, e eventonan deskribí den e buki ta kuminsá solamente ún aña despues di Israel su éksodo for di Egipto.

Moisés lo a skirbi e contenido esensial di Numbranan probabelmente durante último aña di su bida. Esei a keda kla por lo ménos den e di diesún luna di e di kuarenta aña despues ku Israel a sali di Egipto, pasobra esei ta fecha ku Moisés a kuminsá skirbi e buki di Deuteronomio (segun Deuteronomio 1:3). Pues, e buki di Numbranan a wòrdu skirbí entre 1445 i 1405 B.C.

Pa loke ta regard e tekstonan agregá, ta desconosí ki tempu eksakto esaki por a sosodé. Kisas Josué tabata esun ku a agregá e tekstonan ei. Nos no sa sigur. Ma de todo kaso, ta probabel ku e lo a sosodé promé ku fin di era di Samuel.

C. LESADÓNAN DI E BUKI

Por bisa ku intenshon di e outor tabata pa e di dos generashon di israelita (esnan ku lo konkistá e tera di Kanaan) ta e lesadónan original di e buki pa nan siña e lèsnan ku nan mayornan a nega siña.

III. PROPOSITO DI E BUKI

E buki di Numbranan klaramente no ta konta tur e eventonan ku a sosodé. E outor ta selektá solamente eventonan ku ta siña e bèrdatan ku e ke komuniká. Pues, e ta historia selektivo. E bèrdatan doktrinal ku e outor ke komuniká ta determiná e proposito di e buki i pues e contenido.

Nota algun proposito:

- E promé proposito pa e buki di Numbranan tabata pa Israel por tin un rekòrt di nan historia for di Seru Sinaí te ora ku nan tabata na punta pa drenta e Tera Primintí.
- Ma pa ser mas spesífiko, e outor tin un proposito kla ta konta e historia di *dos generashon*. E generashon di israelitanan ku a wòrdu librá for di esklabitud na Egipto ku no a reashoná ku konfiansa i obediensia pa ku Dios i komo resultado, nan a pèrdè nan chèns pa drenta e tera di Kanaan. (Kapítulonon 1-25 ta konta nan storia.) E di dos generashon ta nan yunan. (Kapítulonon 26-36 ta konta di nan.)
- Un otro proposito di Numbranan, ligá ku esei: Moisés a skirbi e buki pa enkurashá e generashon nobo di Israel pa konfia i obedesé Dios i konkistá e Tera Primintí. E buki ta kòrda nan di e frakaso di nan mayornan i e konsekuente rabia di Dios ku nan a sufri. E historia negativo lo yuda nan komprende i motivá nan pa konfia i obedesé Señor.

Ta bon pa duna mas splikashon aki. Dios a skohe Abraham i su desendientenan (Génesis 12), a libra nan for di esklabitut na Egipto (Éksodo 14-15), i a sera un aliansa ku nan Éksodo 19-20). Ma tòg, pa motibu di nan rebeldia i inkredulidat, e promé generashon di Israel a eksperensia e kandela ferós di e rabia di Dios. Resultado di nan piká tabata 38 aña simpelmente wardando ora di muri, pa e siguiente generashon por tin oportunidat pa konfia i obedesé Señor! Segun Hebreonan 10:34, “Ta un kos teribel pa kai den man di e Dios bibu”.

E teman di konfiansa i obediensia pa ku Dios ta teman importante den e buki. E relashon entre obediensia i bendishon (i desobediensia i maldishon) ta ilustrá rípidamente den e buki.

- Un mesahe kla di Numbernan ta e fieltat i pasenshi di Dios, apesar di Israel su murmuramentu i rebelion kontinuo. (Maske Israel tabata infiel, Dios tòg lo kumpli ku Su promesa.) E buki tambe ta revelá Dios komo Esun ku ta proveé, ta intervení, ta kontestá orashon. Ma e tambe ta komuniká ku Dios ta yalurs, hustu i santu i ta kastigá piká (ku a rebeldiá, nengando di laga Dios kumpli ku Su promesanan). En bista di esaki, talbes Romanonan 11:22 ta ekspresá un mensahe sentral di e buki: “Mira anto e bondat i e severidat di Dios”.

IV. STRUKTURA DI E BUKI

Nos por mira e struktura di e buki di Numbernan di diferente ángulo. For di un punto di bista kronológiko, nos por mira ku e buki ta kubri tres periodo di tempu general:

- I. E binti dia na Seru di Sinaí – 1:1 – 10:10
- II. E 38 aña ku Israel a dwal den desierto – 10:11 – 20:13
Ta importante pa komprendé ku kasi tur evento den e buki a tuma lugá durante e aña despues di e éksodo òf e último aña nèt promé ku nan a drenta e tera. Kasi ningun evento mensioná den e buki a tuma lugá durante e 38 aña ku nan a dwal den desierto.
- III. E seis luna na fin di e 40 aña – 20:14 – 36:13

Mirá for di un ángulo geográfiko:

- I. Na Seru di Sinaí – 1:1 – 10:10
- II. For di Seru Sinaí te sabananan di Moab – 10:11 – 20:13
Esaki ta inkluí e 38 aña ku Israel a dwal di un sitio pa otro den desierto.
- III. Den sabananan di Moab – 20:14 – 36:13

Ma e struktura ku nos ta preferá ta haña dos parti prinsipal den e buki. E promé divishon ta konsentrá riba e promé generashon ku a skapa for di Egipto, a rebeldiá i no a drenta e tera. Fóke di e di dos parti ta e di dos generashon ku lo drenta e Tera Primintí.

Un pregunta prinsipal ta, “Unda e outor ta kuminsá konta tokante e di dos generashon?” Segun opinion di algun, e dwalmentu den desierto ta inkluí tur teksto for di momentu ku e generashon bieu a nenga drenta e tera (kapítulo 14) te fecha ku Aaron a fayesé (20:22-29). Pues, kapítulonon 1-20 ta papia di e generashon bieu i kapítulonon 21-36 ta konsentrá riba e generashon nobo.

Ma ta pusibel ku Moisés ta introdusí kada generashon ku un senso. Mirá di e forma ei, e siguiente skema di Dennis T. Olson i John MacArthur ta kuadra:

- I. Eksperensia di e Promé Generashon di Israel den Desierto – 1:1 – 25:18
 - A. Obediensia di Israel pa ku Señor – 1:1 – 10:36
 - B. Desobediensia di Israel pa ku Señor – 11:1 – 25:18
- II. Eksperensia di e di Dos Generashon di Israel den Desierto – 26:1 – 36:13
 - A. Preparashon pa Konkista di e Tera – 26:1 – 32:42
 - B. Repaso di e Viahenan den Desierto – 33:1-49

C. Antisipashon di Konkísta di e Tera – 33:50 – 36:13

Un otro opservashon interesante ta ku talbes e outor ta pone e storia di Balaam (kapítulonon 22-24) nèt meimei di e dos generashon komo un pouza den e relato—komo sifuera e storia aki por pertenesé na e generashon bieu, òf na esun nobo. Ta kasi komo sifuera e storia di Balaam ta e klímaks di e relato di Dios Su protekshon di Su pueblo skohí.

V. OPSERVASHONNAN DI E BUKI

Tin hopi evento i instruksion religioso i sivíl ku nos por mensioná. Ma nos por hasi algun opservashon so.

A. NUMBERNAN DEN NUMBERNAN

1. Sensonan

Tin dos senso den e buki di Numbernan (kapítulonon 1 i 26). Tur dos senso tabatin proposito militar. Nan tabata preparatorio pa drenta e tera di Kanaan. Ma Israel a tarda 38 aña pa drenta e tera despues di e promé senso nesesitando e di dos senso.

E senso no tabata un konteo di tur israelita. Ma e echu ku tabatin un tiki mas ku 600.000 hòMBER israelita ku por a sirbi komo sòldá ta duna indikashon ku e poblashon kompleto por tabata entre dos pa tres miòn israelita!

E senso tambe a yuda ku organisashon i òrdu den e kampamentu. Kòrda ku Israel a kaba di haña libertat for di esklabitud. E senso a yuda uni un multitud di hende komo un nashon.

Pa hende di nos era moderno, ta laf pa lesa e senso. Ma en realidat, e sensonan ta kuadra ku e proposito di e buki. Kada senso ta introdusí un generashon israelita. E senso den kapítulo 1 ta introdusí e generashon ku Dios a reskatá for di esklabitud na Egipto. E generashon aki a murmurá konstant i a deskonfiá i desobedesé Dios. Porfin Dios a prevení nan di drenta e tera ku El a primintí pa duna nan. E di dos senso, den kapítulo 26, ta introdusí yunan di e promé generashon. E buki tabata skirbí pa reta e generashon aki pa konfia i obedesé Dios i konkistá Kanaan.

2. Organisashon

Kapítulonon 2-4 ta trata ku organisashon di e kampamentu di Israel. E lokalidat unda kada tribu mester kampa rònt di e tabernakel, ku e tribu di Levi mas serka e tabernakel ta e tópiko di kapítulo 2. Kapítulonon 3-4 ta konsentrá riba e levitanan: un senso di nan, unda nan mester kampa i nan responsabilidatnan. Klaramente Dios ta un Dios di òrdu...no di desòrdu (1 Korintionan 14:33,40).

3. Ofrendanan

Na nos manera di pensa, kapítulo 7 ta rípitishon innesesario i sumamente laf. Den e kapítulo aki, líder di kada tribu a duna un regalo for di nan kurason, totalmente boluntario. Ofrenda di kada un tabata idéntiko, ma tòg e outor ta rípití tur diesdos ofrenda. Nos por siña for di esaki ku Dios tin atenshon pa kada ofrenda generoso ku kreyentenan ta dun’E.

B. KRONOLOGIA

Básikamente nos por bisa ku e buki ta skirbí den un òrdu kronológiko. E buki ta kubrí un periodo di kasi kuarenta aña.

Numbernan ta habri ora Israel tabata na Seru Sinaí (1:1), mas òf ménos ún aña despues ku nan a wòrdu librá for di esklabitud na Egipto. Ma ora nan tabatin oportunidat pa drenta e tera ku Dios a primintí nan (Numbernan 13-14), nan a nenga konfia Dios. Komo resultado di nan inkredulidat i desobedensia, tur persona di binti aña bai ariba tabata kondená pa muri durante un estadia di kuarenta aña den desierto. For di e generashon ei, solamente Josué i Kalèb por drenta e tera.

Ma e buki ta klousurá ku un otro generashon ku si lo konfia Dios i obedesé. Na fin di e buki, e di dos generashon tabata lokalísá den “e sabananan di Moab banda di Jordan enfrente di Jeriko” (36:13) kla pa drenta e tera.

Will Pounds a diseñá e siguiente skema listando e eventonan ku a destacá despues di e eksodo. (E referensianan ta di e buki di Numbernan so.)

Fecha	Sitio	Evento	Teksto
Luna 1; dia 15	Egipto	Salida di Egipto	
	Laman Korá	Krusa Laman Korá	
	Mara, Elim, Desierto di Sin	Pueblo murmurá	
Luna 2; dia 15		Patrishi i mana	
	Refidim	Awa for di baranka	
		Bataya ku Amalek	
Luna 3; dia ?	Sinaí	Dies Mandamentunan	
		Moisés riba seru Sinaí 40 dia	
		Bishé di oro	
		Moisés riba seru Sinaí 40 dia mas	
Aña 2; luna 2; dia 1		Konstrukshon di tabernakel	
		Promé senso	1:1-54
Aña 2; luna 2; dia 20		Biaha for di Sinai	10:11-36
	Tabera	Kandela, patrishi, plaga	11:1-35
	Hazerot	Rebellion di Miriam i Aaron	12:1-16
	Kades-barnea	Spionnan mandá	13:1-33
		Pueblo ta rebeldiá	14:1-9
		Moisés ta interседé	14:10-38
		Pueblo derotá	14:39-45
		Rebeldia di Koré—14,700 ta muri	16:1-50
Aña 2 - 40		Aaron su bara ta saka flor	17:1-13
Dwal den desierto 38 aña			
Aña 40; luna 1	Kades-barnea (di 2 biaha)	Morto di Miriam	20:1
		Awa for di baranka i Moisés su piká	20:2-13
		Salido pa Kanaan pa di dos biaha i Edom ta nenga laga Israel pasa	20:14-22
Aña 40; luna 5; dia 1	Seru Hor	Morto di Aaron	20:23-29
Aña 40; luna 11; dia 1		Israel ta destruí e kananeonan	21:1-3
	Sùit di Seru Hor	Kolebra di brons	21:4-9
	Pariba di Edom	Derota di amoreonan i Basan	21:21-35
	Sabananan di Moab	Balaam i piká di Peor	22:1 – 25:18
		Di dos senso	26:1-65
		Vengansa riba e madianitanan	31:1-54
		2½ tribu ta habitá parti pariba di Jordan	32:1-42
		Diskursonan di buki di Deuteronomio	
	Seru Nebo	Morto di Moisés	
Aña 41	Riu Jordan	Krusa Riu Jordan pa drenta e Tera Primintí	

C. MURMURAMENTU

Sin duda, e israelitanan tabata den un situashon prekario. Dos pa tres mion katibu a skapa di esklabitud. Nan no tabatin hopi oportunitat pa prepará pa nan viahe den desierto. Kiko lo nan kome? Kiko lo nan bebe? Ki ruta lo nan sigui? Kiko di paña i sandalia pa e viahe?

Dios tabata nan kontesta. El a sòru pa tur esei ku un milager tras di otro. El a proveé awa...asta for di baranka si tabata nesesario. Dios a duna nan mana kada mainta—i asta karni. E nubia milagroso ku a guia nan a bira un pilar di kandela anochi. Asta Dios a sòru pa nan paña i sandalianan no gasta...pa kuarenta aña! Ma apesar di tur loke Dios a hasi pa Israel, nan a murmurá, gruña i keha kontra Dios i Moisés ripitidamente.

No ta difísil pa murmurá. Murmuramentu no ta rekerí talento, don spiritual, abilidad, karakter, ni inteligensia. Ken ku ta por murmurá. Ademas, murmuramentu no ta logra nada. Na lugá di aliviá e karga, murmuramentu ta hasi e karga mas pisá.

Nos ta konsiderá murmuramentu un “piká chikitu”...òf no un piká mes. Ma ripará kuantu daño e murmuramentu di e israelitanan a kousa i kon severo Dios a trata ku e piká!

Dios ta deseá un aktitud di gratitud. “Sea gradisido den tur kos; pasobra esaki ta e boluntat di Dios pa bos den Cristo Jesus” (1 Tesalonisensenan 5:18).

D. DWALMENTU DEN DESIERTO

Lesando e buki, e lektor ta keda asombrá kon tiki informashon tin tokante e 38 aña ku Israel a dwal den desierto.

Kapítulonon 13 i 14 ta konta ku Israel a yega te na e Kades-Barnea. Nan por a mira e Tera Primintí. E multitud a insistí pa manda 12 spion pa bishitá e tera promé (Deuteronomio 1:22). E spionnan a opservá ku e tera ta bon i fruktífero. Ma nan a fiha nan bista riba e obstakulonan—e statnan bon fortifiká ku murayanan diki, e sòldánan gigantenan—lubidando Dios. Na lugá di konfia Dios, e rapòrt negativo di dies spion a motivá e israelitanan pa nenga drenta e tera. Asta nan a kuminsá palabrá pa piedra e dos spion ku a duna un rapòrt positivo, Josué i Kalèb, (i kisas asta Moisés i Aaron) i regresá na Egipto. Moisés su kurason lo tabata kibrá!

Dios a kondená tur israelita di binti aña bai ariba pa muri den desierto, ku eksepsion di Josué i Kalèb. Nan lo dwal den desierto pa kuarenta aña total wardando pa nan tur muri.

En general, nos por bisa ku nos sa masha poko di loke a sosodé durante e 38 aña den desierto. Echu ta ku kasi tur e eventonan deskribí den e buki a tuma lugá durante e promé 1-1½ aña ku Israel a wòrdu librá di Egipto i e ún aña nèt promé ku nan a drenta Kanaan. Pues, talbes nos por bisa ku maske e buki di Numbernan ta kubri un periodo di 38-40 aña (henter e tempu ku nan a dwal den desierto), e informashon den e buki ta trata ku solamente dos pa tres aña. Ta komo sifuera Dios ta indiká ku E no ta hasi kaso mas di e generashon ei pa motibu di nan apostasía i inkredulidat. Komo resultado, historia di Israel durante e 38 añanan ei no tabata importante.

Ta bon pa ripará ku Dios no tin purá. E tabata despuesto pa warda 40 aña pa un otro generashon lamta ku tin e mentalidat di Josué i Kalèb—hende ku maske nan ta mira e murayanan diki, e hendenan haltu, e ehersitonan enemigu poderoso, nan bista riba na Dios omnipotente i soberano! E buki di Numbernan ta un yamada pa kreyentenan konfia Señor ku henter nan kurason, i komo resultado, nan lo konsechá Su bendishon.

E. STORIA DI BALAAM

Ta interesante ku e storia di Balaam ta tuma tres kapítulo—kapítulonon 22-24. Di bèrdat, si nos agregá e resultado di Balaam su konseho, nos mester inkluí kapítulo 25 i 31.

Arkeologonan a deskubrí evidensia di un person ku tabata yama Balaam. E tabata un hòmber mashá famoso tantu den e region ei komo internashonalmente, asta síglonan despues di su morto. E tabata un miradó di destino eksperto ku tabata wak shirishiri di bestia òf moveshon di para pa determiná kiko e diosnan a deseá. Talbes esaki ta e mésun Balaam ku nos ta studia.

E storia di Balaam ta mashá chistoso! Balaam a kere ku e por a manipulá e Dios di Israel manera e tabata hasi ku kulake otro dios. Ma e no tabata por! Dios ta intervení ripitidamente. El a bisa Balaam pa no bai serka Balak, rei di Moab, pasobra El a bendishoná Israel. Tòg Balaam a insistí...deseando e onorario. Balaam su buriku tabatin mas disernimentu kun' é i asta ta papia pa hala su atenshon na e angel den su kaminda.

Desesperá, Balaam ripitidamente ta purba maldishoná Israel. Ta komo sifuera, ora Balaam a habri su boka pa maldishoná Israel, Dios a pone bendishonnan bunita ta sali di su boka na forma poétiko pa ku Israel i maldishon pa nan enemigunan! Balak ta furioso.

Ora Israel a tende e storia aki, nan lo a grita hari. Apesar di nan rebeldia, Dios soberano a protehá Su pueblo asta ora nan no tabata konsiente di Su obra!

Bendishon pa ku e pueblo di Israel ta kurason di Numbernan i henter Pentatuk. Talbes ta p'esei e relato tokante Balaam ta asina prominente den e buki. Dios ta fiel pa kumpli ku Su aliansa maske Su pueblo tabata infiel. Israel ta un nashon bendishoná i protehá pa Dios.

Balaam a komuniká kla ku Dios Su bendishon di Israel ta pa motibu di Su soberania: “Dios no ta hende, ku E lo gaña, ni yu di hende, ku E lo repentí. Akaso El a bisa, i E lo no hasié? Òf El a papia, i E lo no kumpli?” (23:19). Tambe, maske Balaam tabata enemigu di Israel i no a stima Dios, tòg Dios a dun' é un vishon remarkabel di e Mesias ku lo bin mas ku 1400 aña despues: “Mí a mir' é, ma no awor; mi a wak é, ma no di serka. Un strea lo sali for di Jakòb, i un

sèpter lo lanta for di Israel, i lo plècha frenta di Moab i baha tur e yu hòmbèrnan di Sèt abou” (24:17).

Tristu ta ku esei no ta fin di storia di Balaam. Numbernan 25 ta konta ku e profeta pagano, sin duda deseando e onorario luhoso, tòg a bin ku un strategia pa hasi daño na Israel. E damanan di Moab i Madian, instigá pa Balaam (31:16), a sedusí e hòmbèrnan di Israel pa adorá nan dios, Baal. No ta konosí presis kon esaki a sosodé. Ma de todo kaso, e hòmbèrnan—asta lídèrnan—di Israel a partisipá den un fiesta pagano ku a inkluí immoralidat grosero. Komo resultado Dios a kousa un plaga ku a mata 23.000–24.000 israelita. Asta un líder di Israel den pleno bista a trese un muhé moabita (talbes un saserdote femenino) dilanti tabernakel, unda e israelitanan tabata lamentá pa motibu di nan piká. Finees a mata nan tur dos, poniendo un parona e plaga.

Den kapitùlo 31, Dios a instruí Israel pa tuma vengansa kontra e madianitanan tabata ligá ku e moabitanan kontratando e servisionan di Balaam. Den e bataya ku a sigui, Balaam a wòrdu matá (31:8).

Den Tèstamènt Nobo, Balaam ta mensioná tres biaha komo un ehèmpel di un profeta falsu ku tambe tabata motivá pa rikesa (2 Pedro 2:15; Hudas 11; Revelashon 2:14).

F. 2½ TRIBU NA OTRO BANDA DI RIU JORDAN

Sihon, rei di e amoreonan, i Og, rei di Basan, a bin bringa kontra Israel (21:21-35). Dios a entregá nan den man di Israel. Nan teritorio tabata pariba di e riu Jordan—no parti di e tera ku Dios a primintí Israel. Kapitùlo 32 ta konta ku e tribunanan di Ruben, Gad i mitar tribu di Manasés a hasi petishon na Moisés ku nan por keda biba den e teritorio ei ku nan a konkistá. Nan a splika Moisés ku nan sòldanan lo kompañá e otro tribunanan pa konkistá e tera parti pabou di Riu Jordan anto nan lo regresá i biba pariba di e riu. Moisés a duna nan pèrmit pa hasi esei.

VI. TÈSTAMÈNT NOBO I E BUKI

Tèstamènt Nobo ta sita e buki di Numbernan diferente biaha.

Den Juan 3:14, Jesus, papiando ku Nikodemo, a mensioná e storia ku Moisés a halsa e kolebra di bròns den desierto (21:4-9). Jesus a bisa ku E lo wòrdu halsá manera Moisés a halsa e kolebra den desierto.

Den 1 Korintionan 10:4, Pablo ta bisa ku e baranka ku Moisés a dal pa awa sali (20:1-13) ta simbóliko di Kristo. E konteksto (1 Korintionan 10:1-10) ta mensioná diferente evento ku a sosodé den e buki di Numbernan: awa for di baranka (20:1-13), adorá ídolo (25:2), immoralidat resultado den un multitud di morto (25:1-9), morde dor di kolebra (21:4-9), i murmuramentu ku a sosodé konstant (11:1,4,10; 12:1; 14:2,27,29,36; 16:11,41; 17:5). En bista di loke a sosodé ku Israel, 1 Korintionan 10 ta kontené un spièrtamentu solemné: “Pesei, laga esun ku ta kere ku e ta para tene kuidou pa e no kai.” (10:12).

Hebreonan 3-4 ta sita Numbernan 13-14 (Israel nengando di dreña e Tera Primintí). Nan desobediensia tabata pa motibu di inkredulidat. E persona ku ta konfia Dios di bèrdat lo hasi loke E ta bisa.

Manera nos a mira kaba, 2 Pedro 2:15, Hudas 11 i Revelashon 2:14 ta papia di e siñansa i kaminda di Balaam. E ta mensioná pa su siñansa falsu i golosidat pa plaka. Ora Dios a prevení Balaam di maldishoná e pueblo di Israel, el a introdusí un siñansa ku a resultá den idolatria i immoralidat.

I nos por siña hopi for di e israelitanan den Numbernan—tantu nan ehèmpel positivo komo ehèmpel negativo. Romanonan 15:4 ta bisa, “Pasobra tur loke a wòrdu skirbí promé ayá a wòrdu skirbí pa nos instrukshon, pa dor di pèrseveransia i e enkurashamentu di Skrituranan nos por tin speransa.” Tambe 1 Korintionan 10:11 ta laga sa ku “Awor e kosnan aki a sosodé ku nan komo un ehèmpel, i nan a wòrdu skirbí komo un spièrtamentu pa nos, riba kendenan e finnan di e siglonan a bin.”

Literatura Konsultá

- Allen, Ronald B. Gaebelein, Frank E. ed. *The Expositor's Bible Commentary*: (Grand Rapids: Zondervan Publishing House, 1988), vol. 2, p. 657-699.
- Archer, Gleason L. Jr. *A Survey of the Old Testament Introduction* (Chicago: Moody Press, 1994), p. 249-256.
- Baxter, J. Sidlow. *Explore the Book* (Grand Rapids: Zondervan Publishing House, 1960), vol. 2, p. 155-206.
- Boyd, Robert. *Boyd's Bible Handbook* (Eugene, OR: Harvest House Publishers, 1983), p. 81-88.
- Demaray, Donald E. *Bible Study Sourcebook* (Los Angeles: Cowman Publishing Company, 1964), p. 69-70.
- Halley, Henry H. *Halley's Bible Handbook* (Grand Rapids: Zondervan Publishing House, 1964), p. 138-145.
- Harrison, Ronald Kenneth. *Introduction to the Old Testament* (Grand Rapids: William B. Eerdmans Publishing Company, 1969), p. 614-634
- Hill, Andrew E. & Walton, John H. *A Survey of the Old Testament* (Grand Rapids: Zondervan Publishing House, 1991), p. 130-141.
- Hindson, Edward E. & Kroll, Woodrow Michael. gen. ed. *Liberty Bible Commentary* (Nashville, TN: Thomas Nelson Publishers, 1982), p. 248-249.
- Jensen, Irvin, L. *Jensen's Survey of the Old Testament* (Chicago: Moody Press, 1978), p. 115-124.
- Lockyer, Herbert. gen. ed. *Nelson's Illustrated Bible Dictionary* (Nashville, TN: Thomas Nelson Publishers, 1986), p. 765-766.
- MacArthur, John. *MacArthur's Quick Reference Guide to the Bible* (Nashville, TN: W Publishing Group, 2001), p. 18-23.
- Mears, Henrietta C. *What the Bible is All About* (Minneapolis: World Wide Publications, 1966), p. 55-64.
- McGee, J. Vernon. *Thru the Bible with J. Vernon McGee* (Nashville, TN: Thomas Nelson Publishers, 1981), p. 453-454.
- Miller, Adam W. *Brief Introduction to the Old Testament* (Anderson, Indiana, Warner Press, 1964), p.
- Oswalt, J.N. Tenney, Merrill C. ed. *The Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 4, p. 462-469.
- Pfeiffer, Charles F. ed. *The Wycliffe Bible Commentary* (Chicago: Moody Press, 1962), p. 111-114.
- Pound, Will. <http://www.abideinchrist.com/messages/numtime.html>, 18 desèmbèr, 2012.
- Richards, Lawrence O. *The Revell Concise Bible Dictionary* (Tarrytown, NY: Fleming H. Revell Company, 1991), p. 406.
- Ridderbos, N.H. Douglas, J.D. organizing ed. *The New Bible Dictionary* (Grand Rapids, MI: Wm. B. Eerdmans Publishing Co., 1964), p. 898-901.
- Wilkinson, Bruce & Boa, Kenneth. *Talk Thru the Bible* (Nashville, TN: Thomas Nelson Publishers, 2002), p. 27-35.